

山右石刻叢編

山右石刻叢編卷二十八

魏主史學士張某等奉勅撰刻御史巡撫山西蔡提督設印務制庶務等衙門明諭之

元

二賢祠加封記

碑高二尺二寸廣二尺十八行
行二十四字正書今在永濟縣

夫夷齊特立獨行而不惑者歟信道篤而自知者明讓國而
逃且當商之亡周之興武王率天下諸侯而伐紂彼二賢
乃獨以為不可商既滅天下宗周恥食其粟遂隱于首陽山
飢死而不顧昭乎日月不足為明萃乎泰山不足為高夫子
稱其賢孟子為之聖二賢之遺風愈遠愈彰俾人敬慕而
不忘據山東東西道提刑按察司備知事張思誠申益都路
有山曰孤山山之上有一廟驗之石刻乃亡宋崇寧間封爵伯

夷曰清惠侯叔齊曰仁惠侯本府僚吏因水旱為厄禱而應
達諸省部改封公爵仍加號二字伯夷為昭義清惠公叔
齊為崇讓仁惠公賜宣命改封事原其出處始生之地孤
竹國也今之平州是焉死節之地首陽山也今之河中是焉
益都非二賢故跡又詭祈禱之應遂獲封號儻蒙表其封
爵告諸二邦省部從其請迨承務郎張公來臨是郡佐政
清簡翌日從容詢其僚屬案牘郭君仲安等曰

夷齊封號聖朝褒增崇尚刻諸貞石以示不泯豈不偉歟
僉曰唯唯徵辭於僕固不敢肆其淺陋斂衽以誌其端緒云

皆元貞元年正月既望日題

河中府儒學教授柳謙撰

邑人趙民書丹

古舜賀直刊

按元至大元年河中判官甯德豫二賢碑陰記云至元辛巳歲乃頒明詔加封曰公前河中教授儒學柳謙已志之貞石卽謂此碑据此碑所云山東東西道提刑按察司知事張思誠申益都路孤山有廟驗之石刻乃亡宋崇甯間封爵伯夷曰清惠侯叔齊曰仁惠侯本府僚吏因水旱爲厄禱而應達諸省部改封公爵仍加號二字是至元加封以益都路之請而賜惟甯碑言至元辛巳加封

辛巳至元十八年

而元史世祖紀至元十五年十二月丙午封伯夷叔齊則先辛巳三年封碑與史必有一誤又碑言承務郎張公來臨是郡佐政清簡詢其僚屬

郭君中安

命柳謙爲文志之按元

史阿勒台傳爲平灤路總管至元十年進懷遠大將軍灤

爲孤竹故國乃廟祀伯夷叔齊以勵風俗此元初平灤祀
夷齊在益都前之證碑末題元貞元年正月旣望日河中
府儒學教授柳謙撰邑人趙民書丹碑見寰宇訪碑錄

加封崔府君詔

碑高二尺八寸廣一尺九寸二分十
五行行十七字正書今在

大元加封詔書

上天眷命

皇帝聖旨有功則祀今古之常經無感不通神明之至德齊
聖廣祐王禮嚴祀典名著史編歷代褒崇洋洋闡靈之如在
主人嘉賴簡簡垂惠以無疆曾司衡嶽之權久重滄陽之鎮
靈懿夫人夙稱柔則克配英風玉燭均調順陰功而內助翠
帷儼肅祐多福以旁周宜並錫於嘉名用茂揚於休聞於戲

渙其大號既遺爾家室之榮享於克誠益贊我山河之固齊
聖廣祐王可加封靈惠齊聖廣祐王靈懿夫人可加封順祐
靈懿夫人主者施行

元貞元年二月 日

按元史世祖紀至元十五年正月己亥封磁州崔府君爲
齊聖廣祐王此詔又加封靈惠二字靈懿夫人加封順祐
二字並見是詔按崔府君神見文獻通考崔府君廟在京
城相傳唐潞陽令沒爲神主幽冥事廟在磁州清化初民
有於此置廟後詔修廟宇賜名護國廟及送衣服供具景
德元年重修每歲春秋令開封府遣官致祭後封護國顯
應公揭奚斯重修平定州府君廟記長樂坊有崔府君廟
敕封護國顯應王不知何代相傳廟建自宋宣和間文獻

通考宗廟門封漢崔瑗祠爲護國顯應昭惠王自注徽宗朝然則顯應公崔府君神也顯應王者崔瑗祠也皆封自宋按三教搜神記唐潞陽令崔府君名子玉祁州鼓城人貞觀七年除長子縣十七年遷潞陽令沒爲神後封護國顯應公因神名與漢崔瑗號同誤爲崔瑗非也据此詔則靈惠齊聖廣祐者元所封而元人諸碑如和順李大亨崔府君廟碑平定州揭傒斯碑皆不言元代封號顯應王爲崔瑗封則更無及之者

潞城修學記

碑高一尺八寸五分廣二尺五寸二十九行行二十字正書今在潞城縣

潞城縣修學記

邑人李仔書

夫守令之選責在於化民而化民之道無先於興學明此理者惟賢者能之潞城縣俗厚民淳家知敬讓鴻儒碩士代不乏人廟學處縣治之東南隅閱年多矣自

皇朝革命馴致隆平是廟也歷前政數輩興滯補弊僅見其完具至於師資講授之堂未遑也大同人劉公名說君霖其字也門傳組綬世篤忠貞至元癸巳以敦武校尉來尹是邦性賦仁賢政尚慈愛凜凜然有古循吏之風視事以來首以興學校為己任每念後進無肄業之處欲為堂於廟東之隙地惟重於勞民猶豫久之議及同官達魯花赤也可迷闢暨主簿王公名傑字伯英二公曰可於是度材計傭鳩工輦木師儒鄉社以貲以力用有弗克仍以已貲佐之命直學申周嶽總其事公於撥繁理劇之暇躬臨其役序其勤而憫其勞

所以匠氏倣能人樂為用經始於元貞元年之季春迨是年
季夏而落成焉甃以崇階覆以夏屋高明堅整輪焉奐焉庶
令鄉邑之人共識弦歌之化新一方之觀聽舉六十餘年之
墜典名之曰明道堂又以春秋二仲行釋菜之禮祭器未有
命工陶冶而成之將見此方文風丕變英士如林實權輿於
此公於興學新民之道可謂知所務矣邑中耆宿前典史常
善暨教諭梁棟等相謂曰君侯有此嘉政盍文之於石以示
後人顧不偉歟眾皆以為然遂謁余為之記余固辭不免因
為述其本末云

元貞元年五月下旬有五日上黨韓仲元記

前典史常善

申周嶽立石

木匠路忠 石匠田旺刊

按碑題邑人李仔書潞城縣志舊志歷代營建廟學可稽者有金大定二年進士王著記十六年進士楊植記元至元五年縣人李質記十二年縣人王利用記元貞元年上黨韓仲元記按仲元記卽此碑碑言大同人劉公名說君霖其字至元癸巳以敦武校尉來尹是邦性賦仁賢政尚慈愛凜凜然有古循吏之風視事以來首以興學校爲己任按癸巳至元三十年此說以是年尹潞之證碑立元貞元年是說元貞初猶未去潞也碑有議及同官達魯花赤也可迷闌主簿王公傑字伯英云云今潞城志元達魯花赤無也可迷闌宜据此碑補鳳臺縣志王傑以父思忠雲州知州蔭補官初授潞城簿歷聞喜尹轉冀甯路治中不

言何年爲潞城簿据此碑則以至元癸巳任呂希才聞喜
補修宣聖廟碑延祐間有縣尹王傑聞喜縣志傑字伯英
澤州人與此碑合碑以元貞元年季夏廟學講堂落成而
作末題元貞元年五月下旬有五日上黨韓仲元記仲元
大德十一年爲壺關教諭見潞州重修文廟碑陰其曰邑
中耆宿前典史常善教諭梁棟云云並可爲考晉文獻者
之助

后土廟重修記

碑連額高四尺九分廣二尺二寸三分二十五行
行四十字額題六字均正書今在鄉甯縣城內

后土廟重修記

本縣儒學教諭白賁撰

鄉人賈瑤書丹并題額

鄉寧縣邑按杜氏春秋謂之□□納翼侯於此年踰百世地方千里鄰三路而控五州處高原而帶十縣土厚人純地產名駒崑生□□洪爐至於磁窯鐵冶佳菓美木以之富民以之利

國寶古之名邑也縣初在鄂城西南三里許值水患移於此城東北有

后土聖母之祠創建於亡金大定之初地形高阜廟貌雄偉環列諸神之祠雕臺露砌甬道三門無不完備中有繁蔭蔽日雖酷暑而游人罷扇方官僚香火之場真士庶祈禱之所一旦兵塵所廢幾為灰燼止有正殿及武安王之祠迨

聖朝壬寅年嘗為粧蓋迄今五十余年椽瓦崔嵬垣墻圯毀丹青剝落於莓苔

聖像不堪於風雨至元三十年遇甘棠邵侯來簿是邑乃康
節先生之裔也賦性溫雅才器不凡有兼善之心每遇朔望
行香觀廟之顏隳未嘗不慨嘆焉一日置酒於廟亭會衆而
言曰予仕路人也任滿而歸今此廟乃一方之奇觀如此荒
涼若一朝倒塌棄千金不能有也予欲假衆力而重修何如
衆皆允許於是命邦人史秉等九人辦其事日經月營不假
威力而廟復完寔起功於元貞元年春首功畢於是年之秋
楮傾剔口革故鼎新及修蓋五嶽四瀆武安王之祠補塑粧
盤

后土聖像大小碑額使邦人重禱於琳宮尊

聖像安居於寶殿前後廟宇金碧煥耀為之一新經營既大
工價良多非邵侯之丹懇黔庶之扶持其能是乎噫安得大

手筆者書之琬^璵以詒於後不期邵侯率諸邦人徵文於子
乃戰慄而謝曰爲此文者皆老師宿儒之作也愚鄙魯之甚
羞齒士人之列寔無才德安敢爲之其本官及邦人臨門堅
請者再四既不獲已勉以愚見聊序其所由以待來者云

元貞二年正月望日記

副功德主史秉 趙天錫 丁安 王章 劉珎 龔濟

田祐 曹瑜 趙順 任城務

都監張仲禮 相副 苗天澤 捏古友

庫子王庸

縣吏武珪 白思溫 張昱 曹思敬

典史郭庭彥

后土廟重修功德主鄉^亭縣主簿兼尉兼管本縣諸軍輿

魯邵質立石

從仕郎鄆_寧縣尹兼管本縣諸軍與魯兼勸農事牛天麟
保義校尉鄉_寧縣達魯花赤兼管本縣諸軍與魯兼勸農
事脫脫赤

石匠龍門張伯達鄭信等刊

按碑題本縣儒學教諭白賁撰鄉人費瑤書丹并題額瑤
元鄉甯進士大德三年書牛師顏荀大夫廟碑題銜爲進
士此碑曰鄉人則在未舉進士前按元皇慶二年始行科
舉至大前題進士者皆儒貢也碑云鄉甯縣邑地方千里
鄰三路而控五州處高原而帶十縣三路者元太原安西
延安三路五州者吉陽汾延安鄜也今縣志鄉甯接壤者
爲襄陵稷山吉州韓城大甯太平蒲河津宜川元時隰州

之溫泉未省而吉州治吉鄉縣碑所云十縣者當以此碑
又云城東北有后土聖母之祠創建亡金大定之初元張
安石后土廟重修記金大定二十五年移建與此碑不甚
合碑云兵塵所廢幾爲灰燼卽張記所云己卯城陷事其
曰聖朝壬寅年嘗爲妝蓋者亦與壬寅年碑合碑言至元
三十年甘棠邵侯來簿是邑唐以後謂陝州爲甘棠邵蓋陝州人卽碑末之
邵質所題從仕郎鄉甯縣尹牛天麟牛師顏碑所云家君
從仕者卽天麟天麟至元十七年爲壺關縣尹見韓仲元
大覺寺記壺關縣志恆山人又按碑有云磁窯鐵冶以之
富民利國新唐書地理志吉州縣昌甯有鐵此今鄉甯產
鐵之證碑見通志金石記

狄青祠記

碑連額高二尺八寸廣一尺六寸二十一行行三十三字正書額題狄武襄公祠記六字篆書今在汾陽縣

狄武襄公祠堂記

進士王國華撰書并篆額

功崇祀遠理□□公實寓焉夫公狄姓諱青字漢臣迺西河狄家杜之巨族也公生□丰姿竒偉慎重□言奮自布衣善於騎射少好將帥之節里閭俠少多從之者初遊

京師遂補拱聖□行師必正部伍明賞罰雖敵猝犯之無一士之敢先後者故常以□與士同飢寒勞□嘗獨被髮面銅具挺身軍陣衆莫敢爭丞相韓公琦資政殿學士范□仲淹同秉武節□于西邊公時為裨將二公見其器宇恢軒仲淹又嘗以左氏春秋授□以謂為將者不□不知書匹夫之勇無足尚也公于是自春秋戰國至于秦漢以來成□之迹繫

而能通□為涇原招討起居舍人尹洙知渭州因與公善洙
學通古今嘗與公□用兵之術稱曰□古之名將強無以過
其先也又謂有古良將之略豈誣也哉公嘗伏□兵法曰以
治待□以逸待勞此善用兵者也為國虎臣威震夷羌而
談禮樂□而為□伐剛而能柔威而不猛

天子擢陞歷官樞□使封武襄公此布衣之極也公配魏氏
封定國夫人生子六人焉長□諒三班奉職蚤□次曰諮西
上閣門副使次曰詠內殿崇班閣門祗候次曰諱內殿崇□
次曰說東頭供□官蚤卒次曰諫內殿崇班蚤卒二女許嫁
而卒焉公西定○夏南平□智年甫五十感□于陳州而薨
歸葬于汾之西河公之子西上閣門副使諮與其昆弟□人
謀曰祖居狄□社距西河之遠可以建公祠堂本社起立市

山左名迹集卷二十一
屬使民交易各得其所□是族人曰諾則□子仁人之心莫
盛于此由是建祠三楹中刻神象立市每月六集一□日為
市歷年淦遠□被風雨傾敗迨公之孫曰暉修葺祠宇復立
常市請文銘石以垂□朽云耳謹以是為□ 凡百事
物書于碑陰

大元元貞二年歲在丙申律中姑洗月初旬有六日

前務官七代孫狄暉謹立

校碑題進士王國華撰書并篆額碑言狄武襄事多本宋
史狄青傳子諮詠並為閣門使今碑言公子六人長諒三
班奉職次諮西上閣門使按神宗熙甯元年祭狄武襄文
有西上閣門使狄諮長編諮歷官東上閣門使四方館使
引進使元祐二年五月降使額三年六月辛卯由四方館

使嘉州團練使復引進使九月壬子提舉崇福宮碑又云
次日詠內殿崇班閤門祇候次日熟次日說次日諫汾陽
縣志狄詠字子雅父廕官內殿崇班閤門祇候熙甯七年
出爲瀧州刺史有治績敕書獎諭尋以如京副使知榮州
進皇城使西上閤門副使知廣信軍九年改成都路利州
鈐轄威茂蠻入寇師出詠冒矢石奮擊格鬪誅不順命者
遷客省副使西上閤門使權環慶副總管元豐四年使遼
七年轉東上閤門使以上縣志所載皆据長編又蘇文忠
集書狄武襄事元祐元年十二月與詠館伴北使按此碑
言武襄子六人宋史傳止言諮詠者以諒說諫蚤卒而諫
不顯也碑言諮爲公起祠堂於狄家社並立市廛歷久風
雨摧敗公七世孫暉復之又縣志北鄉四十五里有狄家

社元貞元成宗年號時未定貢舉國華題進士元史選舉志至元二十二年省僉吏員貢法各道按察司每歲貢二名儒人一名吏人一名國華蓋歲貢儒人也

重修五龍廟記

碑高四尺六寸廣二尺三分二十五行
行五十四字正書今在長治縣五龍山

重修五龍廟記

上黨縣主簿兼尉兼管諸軍奧魯杜堯佐書丹

潞州學正程世文篆額

寰宇之內茫茫禹迹有山川則有水土有水土則有人民有人民則有城社有城社則冥冥然有神明赫赫然有師尹各職其職山川水土雨風露雷則神明主之以徵休咎人民城社禮樂刑政則師尹主之以敷教化故能財成天地之道輔

相天地之宜以左右民人神相資理若影響潞之東南距城
二十有五里有山曰五龍環山皆長松黛色參天巍然森聳
烘嵐鎖翠鬱鬱葱葱上有龍祠能興雲致雨每遇旱乾有
禱必應前代封會應五龍王爵廟貌深嚴歷代奉祀居民昏
火不特歲時元貞改元天下大熟獨本境高寒雨霖霜旱害
於西成民有飢色又迫年例遠輸之役人情恟懼道路嗷嗷
牒訟有司稽延不報適會侯公耀卿來知是州下車之始首
勸農民勉種二麥為明年計仍即同僚共議曰民惟邦本食
乃民天食歉民飢義當賑濟而復董遠輸是在上弗及知也
我等親臨安忍坐視遂與達魯花赤小迷失徑詣府庭伸懇
得免閭境遠倉之輸百姓感悅咸德二公既而冬無積雪將
出土牛公為之憂而內自訟曰旱乾水溢予乃知州不得不

任其責迺敬謁

龍祠密有所禱神感其誠翼日乃雪相繼霑足除夜又復大作元日

賀正掃階拜舞臣民同樂望

闕歡呼春滿四郊滯積涌出饑民獲安舉欣欣然有喜色公暨同僚詣祠報謝鄉民有不期而會者數十百人禮畢因遍歷前後顧瞻廟貌憫其庭宇荒涼門牆頽闕風簷雨壁毀瓦畫毀人所不堪神何寧只乃謂耆宿曰神其能福汝等汝等復能報神之貺與我共興此廢乎眾皆曰諾於是首捐已俸施及同僚屬吏部民皆悅而願為之助上下如一不謀而同命匠鳩工有壞必葺乃屏其芻牧禁其樵蘇瓦其繚垣石其階砌中門舞榭載起其樓正殿長廊悉完所損

神龍

聖像繪綵惟新望之儼然尤壯麗於曩者也厥功告成歲則大熟鄉民咸相謂曰嘗聞神依人而致靈人賴神以獲福人神感應固不誣矣豈若我等以守臣之德蒙神明之惠身親見之可不記乎耆老韓廣董善忠等撫其實以請其文且告且嘆曰是廟也一方水旱之所繫者也官是州者非不多也謁是廟者非不先也游晏者非不屢也祈禱者非不頻也向也蓋自牲酒獻斟而往者豈復顧夫廟貌之狼藉也耶今也祈則盡誠報則盡禮弊者復完廢者復起感而遂通所以致時和歲豐者也願刻諸石予諭之曰善為政者在公無不到之心到手無不了之事豈獨廟乎吾州起廢補弊之務尚多將見其續舉而皆畢之自此為始吾為汝記之

元貞二年九月二十日中奉大夫前遼陽等處行尚書省

叅知政事楊仁風記

將仕郎平陽路潞州判官兼管本州諸軍奧魯姚思聰

忠勇校尉平陽路同知潞州事兼管本州諸軍奧魯梁元利

奉訓大夫平陽路潞州知州兼管本州諸軍奧魯勸農事侯吳

昭信校尉平陽路潞州達魯花赤兼管本州諸軍奧魯勸農事小迷失

韓廣□□□董善忠等立石

司廟王益 匠石王厚刊

按碑題上黨縣主簿兼尉兼管諸軍奧魯杜堯佐書丹潞州學正程世文篆額潞安府志杜堯佐上黨縣主簿與碑

題銜合程世文潞州學正時藩王小薛分牧上黨學田分
地中世文與王辨論不避利害王稱服還之見晉川志碑
云元貞改元天下大熟獨本境高寒雨霰霜早害於西成
民有飢色又迫年例遠輸之役人情洶懼道路嗷嗷牒訟
有司稽延不報適會侯公耀卿來知是州下車之始首勸
農民勉種二麥爲明年計仍卽同僚議食歉民飢義當賑
濟而復董遠輸安忍坐視遂與達魯花赤小迷失徑詣府
庭申懇得免云云按以下碑文證之侯公卽侯昊所云救
飢免輸事可補史闕碑末題元貞二年九月二十日中奉
大夫前遼陽等處行尚書省參知政事楊仁風記元史裕
宗傳至元十八年昭睿順聖皇后崩太子自獵所奔赴廬
帳居之命宋衛擇可備顧問者以郭祐何瑋徐琰馬紹楊

居寬何榮祖楊仁風等爲言又云辟仁風於潞州此仁風
受知太子見用之證仁風累見元史本紀襄垣縣志楊仁
風幼聰敏能文登進士授刑部郎中歷官遼陽省參知政
事以中書佐丞致仕碑末所題諸官有將仕郎潞州判官
姚思聰忠勇校尉同知潞州事梁元利奉訓大夫潞州知
州侯昊昭信校尉潞州達魯花赤小迷失皆見府志而思
聰元利題銜有兼管本州諸軍奧魯字昊迷失又加勸農
事字此又當時正佐各官帶銜之別碑見通志金石記

趙仲墓志

碑連額高三尺三寸廣一尺七寸二十一行行三
十六字額題趙侯墓志四字均正書今在鄉蒲縣

大元國鄉（寧）縣趙侯墓誌

前翰林國史院編修官從仕郎鄉（寧）縣尹宋景祁撰

木之成材者必秀於林人之立事者必出乎類或阨窮以固其心或患難以鼓其用其遇草木親戚日月豺狼之秋未有不□□張目徑造轅門以賈其勇者矣此理之常無足怪者侯趙為姓仲為諱高祖某曾祖某父言皆涉書務農不樂求仕侯在金之季年為本縣簿書吏值天兵南伐縣民饑凍逃散殆盡復為彊暴者侵掠侯思拯救之略乃迎懇

太師國王郎中馬公即用侯為記室歲癸巳承

王命建鄉_{（率）}城市為撫治長官猶今令尹也乃按行四境築室墾田搜剔姦宄以軍法從事聲勢甚張殘民稍安未幾鎮西元帥田雄開府隰吉二州擢侯簽判吉州事兼巡禁西河已而疊授平陽府行省胡公丞相暨總府文字依前長官侯

在任歷年久每授上官命愈恭愈謹畏竟以病辭卒于家配孔氏郭氏王氏生五子曰天輔天祐天錫曰和曰順天輔口乱被掠老還鄉于家天祐繼為長官遠近有口長官配費氏生三子忠恩思天錫鄉_寧縣奧魯官口張氏高氏生五子庭琚明玉偉庭巡禁黃河提領琚本府奏差偉本縣吏和陝西出軍千戶妻楊氏生二子曰福祿順妻王氏生一子曰琛侯弟伸金末招撫使經歷分銀符配杜氏生一子曰天祥本縣稅務監妻鄭氏連氏生二子曰玠曰瑜前長官趙侯二女嫁良家諸孫曹孟余為鄉_寧侯長逝已久諸子軀幹長太音語高亮風采尤可重愛者天錫見人有過面折其短退而不揚天祥醇謹門庭罕出不談公事二人如古所謂白眉最良者侯之為人可想見也當是時壺漿迎師豈有欲富貴之心哉

蓋方乃方口之下求民主以救朝夕之死耳天報以邑而奪之速意者有子孫之眷乎不然何^寧馨者衆多也凡今爲侯之後者言忠信行篤敬出入起居無^一怨以聽天之福祿來不追配于前人展與夙寤無忘余言趙氏之福也

虬嶺南卧 龍泉北流 虎踞荒墓 鄉^寧趙侯

大德元年四月二十九日

立石人趙天祥趙天錫趙順

平水石匠徐題刊

校碑題前翰林國史院編修官從仕郎鄉甯縣尹朱景祁

撰鳳臺縣志朱景祁高平人初爲平原教授陞晉城令

作尹元時擢史館編修遷諭德又玉皇行宮記至元三十

無令之稱一年國史院編修朱景祁撰文以志證碑則所題編修官

官鄉甯縣尹均合碑言侯趙姓仲諱父言涉書務農不樂求仕於金之季年爲本縣簿書吏天兵南伐迎愬太師國王用爲記室歲癸巳王命建鄉甯城市爲撫治長官猶今令尹未幾田雄開府隰吉二州擢簽判吉州事巡禁西河又疊授平陽行省胡公暨總府文字以病卒於家有五子曰天輔天祐天錫和順天祐繼爲長官天錫鄉甯縣奧魯官和陝西出軍千戶餘諸孫並弟亦多仕元又元史田雄傳太祖軍至北京雄率眾出降太祖以雄隸太師國王穆呼哩麾下是碑所謂太師國王者亦卽穆呼哩當時尊之故不言其名見諸碑非一傳又云辛巳從攻鄜坊綏葭諸州有功穆呼哩承制授雄隰吉州刺史兼鎮戎軍節度使行都元帥府事與碑文鎮西元帥田雄開府隰吉二州合

碑稱平陽行省胡公攷無平陽行省姓胡者惟舒穆魯明

安傳

注原作石抹明安

子二人次呼圖克華

注原作忽篤華

太宗時爲金

紫光祿大夫燕京等處行尚書省事兼蒙古漢軍兵馬都

元帥又太宗紀六年秋七月以呼圖克諾延

注原作胡土寬那顏爲

中州斷事官諸史拾遺云胡土虎又作忽篤華石抹明安

傳次子忽篤華太宗時爲金紫光祿大夫燕京等處行尚

書省事兼蒙古漢軍都元帥不云爲中州斷事官史之脫

漏也石抹氏自明安至咸得不相繼爲燕京行省胡土虎

蓋承其兄職金亡之後又令斷事中州括中原人戶富在

其時鐵遵赤傳又作忽都其實胡土虎忽都虎忽篤華一

人也又碑謂天祐繼爲長官按元初以地歸順者均世襲

其處宋子貞傳今州縣官相傳以世非法暴斂民窮無告

宜遷轉以革其弊又元文類姚文獻神道碑至元之元羅世侯置牧守是皆繼元初州縣官之證蓋先因招懷新附故權宜置此其後諸臣屢言而遂罷之攷元初典章者亦當知所留意云末有立石人趙天祥趙天錫趙順是卽侯之二子一姪也天祥据碑爲侯弟仲子未出仕故不題官又按碑云侯於癸巳歲建鄉甯城市壬寅碑本張安石后土廟重修記大朝癸巳年權州趙仲劉琮等募民還集復立城池經畫田舍與此碑癸巳建城市合壬寅碑有權州趙仲以此碑證之卽權吉州鄉甯吉州屬縣惟碑言癸巳承王命建城市核元史穆圖哩卒於癸未則非穆圖哩元史太祖十七年壬戌金平陽公胡天祚以青龍堡降按金史傳天祚以降元復叛被殺不得至癸巳以後故知此碑胡公非

天祚也

芮王廟記

碑連漢高六尺一十五分廣二尺四寸六分二十四行行五十六字正書額題四字篆書今在芮城縣西十五里芮王廟記

前進士水谷何南卿東夫撰

雲澤劉大節篆額

從仕郎寧夏府路同知靈州事樊彥書

嘗聞焉飛戾天影流于庭燕人以為鴈越人以為鴈非視之不精勢之相去遠而然也今芮城西十五里枕崇岡有芮王廟焉技之載籍芮君之實雖千載之上可得而推爾芮者古初以草著名故有芮氏焉蔓延而有芮國也當殷紂昏暴虞芮二君爭田久而不平時周文王為西伯修德行善二君曰

國無明斷西伯仁人也盡往質焉入其境行者讓路耕者讓
畔入其邑斑白不提口男女異路入其朝口讓為大夫大夫
讓為卿二君相謂曰吾之所爭周人所恥退乃相讓棄為間
田天下諸侯聞之翕然歸周者四十餘國是為文王受命元
季也芮卒圻內錫封之土乃食采之邑故芮伯世為周之卿
士非特一人而已巢伯來朝作旅巢命時則在武王與六卿
同受顧命時則在成王作桑柔詩以戒貪殘時則在厲王與
虢仲同口曲沃時則在桓王前後凡屢見之所該者四百餘
年陸德明謂非同姓不封姬姓也明矣後世口以芮封國公
號焉矧伯而稱王律之以春秋之口豈不如秦楚之僭然卒
則書名葬則加號亦春秋之書法歷代益遠中間豈無徽号
之錫按端拱明昌二碑皆謂古史稱之為王彼必有所據而

口也以是觀之疑者冰釋魯桓公三年芮伯出居魏芮更立君四年秋秦師侵芮反為芮所敗秦不勝其忿其冬請王師凡九軍共圍魏是時周王之六軍按兵不動人不忘其德為之立祠抵今尚存况我芮君昔以推讓天下感而宗周作為式穀民人皆被其澤宜乎沒世而祀之禮所當然是故轉秦厯漢越唐跨宋迄今而廟貌愈密者有由也正殿榜曰桑柔賁廕之殿賁者以其能光燁於四境廕者以其能覆護於群生冠以桑柔者義取芮良夫之義也門樓高敞獻有殿舞有庭戲有臺與夫左廊右廡塑像煥然梁開平初有 朝旨再立祠宇周顯德間 敕命又加重修宋端拱口詔毀天下淫祠此廟不廢以謂設古帝王之像故也每歲清明中秋享祀不忒舊崇奉香火之杜者凡十有一獨故任存而不改餘皆

竄易其名日月逾邁修毀不一孰能縷數之邪淺自古城廟遷於此地止用五社之力爲夫民者神之主也神本依人而行果能祭之如在何而不靈可以占年而祈穀可以請雨而乞晴可以禳災而禱嗣此皆神之所司也民和而歲豐神降之以景福如影響之應形聲誥誥乎毫釐之不差若夫仗劍現宋帝之宮霖雨退西狄之寇活焦枯之稼而殿重興救張弟之厄而露臺建此自有石碣具存不復贅云

大元大德元年歲次丁酉秋七月中元日

百戶郝翔 王祐 張全 呂瑄 并闕社人等立石

管領芮城河東等縣蒙古軍馬奧魯官牙哥

儒學教諭程元吉

典史秦忠

芮城縣主簿兼尉兼管諸軍奧魯李誠

敦武校尉芮城縣尹兼管諸軍奧魯勸農事郭在

敦武校尉芮城縣達魯花赤兼管諸軍奧魯勸農事□□

□□□安西府等處採石提領天平馬通并男彥溫刊

校碑題前進士水谷何南卿東夫撰雲澤劉大節篆額從

仕郎甯夏府路同知靈州事樊彥書何南卿見元杜思問

水峪永樂觀記師何姓名志淵字東夫幼習儒素科應兼

經遇丁酉國家設貢舉於平陽師中甲科與碑題前進士

合芮城縣志樂全觀元進士何南卿從道創此以居此南

卿南卿本名志淵入道名卽志淵之證芮王廟在城西十五里祀古

芮君秦漢迄唐不替梁開平初勅建祠宇周顯德間重葺

宋端拱中詔毀淫祠茲廟不廢有碑金明昌時亦有碑今

皆不存元大德初進士何南卿撰記云仗劍現宋帝之宮

霖雨退西狄之寇活焦枯之稼救張弟之厄聲靈赫然具

存石碣

按此即謂端拱明昌碑今不存

碑末題大德元年七月中元日百

戶郝翔王祐張全呂瑄并闍社人立石管領芮城河東等

縣蒙古軍馬奧魯官牙哥儒學教諭程元吉

見水谷樂全觀記平陸縣

教諭時并平陸爲一縣見志

芮城縣主簿李誠敦武校尉縣尹郭在敦

武校尉達魯花赤

闕

以縣志考之李誠郭在官皆與碑同

達魯花赤塔海下注言敦武校尉兼管諸軍奧魯勸農事

與此碑同知闕者即塔海

元至大二年二賢碑陰有河中府達魯花赤塔海

又郭

在李誠皆帶兼管諸軍奧魯此爲元縣吏兼知兵事之證

元中統并芮城入平陸至元三十一年八月復見本紀此

碑立大德故有芮城尹簿等官通志金石記方外錄何南

卿字東夫博極羣書以理學自持值亂俘於北太宗丁酉歲設貢舉於平陽中選得免俘然絕意仕進往來汾晉從黃冠師宋披雲名爲志淵號清真子授以講衍之職披雲卒朝命提點永樂純陽宮賜紫衣號淵靖大師至大辛亥卜居芮城中條山水谷創樂全觀年九十一無疾卒著南華經註十三卷水谷代腹七卷碑見通志金石記

昭澤王事蹟銘

碑高二尺七寸五分廣一尺九寸二十六行行三十五字正書今在武襄縣

昭澤王事跡銘

惠陽居士王汝楫撰

前沁州吏武溪任震書丹

監章會仙觀道士史道遵篆額

祭法云有天下者祭百神然則陰陽寒暑水旱其神助天理物彼皆精意以克禋也武漢之南十里而近風俗猶昔有焦氏之故墟焉其廻崗龍盤沓嶺波起勝勢交至於中曰

昭澤王廟攷之世係公姓焦氏自唐咸通七月五日降誕甫七歲握手不展緘口如愚清絕超世(玄)德於心年迄十三夜夢天神賁玉函內有符印寶籙謂公曰予奉 太一真人遺令付汝待旦訴其由父母駭然忻忭是時乾(金)地磔風霾洪水方割公飛符投水妖遯水卻至改元光化有東山居士常公簪裳儼然造門請謁願試(玄)術之萬一共往闊壠水傍擎印驅龍竄陞洞穴常公伏地汗流至踵其後妖疫數起太守王祐求俾又公至使影迹絕滅隨事奏聞 朝廷位賜風雲將軍公意不任高蹈世表後果脫蛻而昇迨開運之世繼

以旱暵禱雨取龍巖之聖水田沃甘霖自茲立祠以廟事之
使域內無札瘥之眚方無螟螣之虞暨宋大觀宣和兩錫茂
恩秩越公侯而設像繪塑纖息具備 金初錫爵封王秩
在祀典故郡邑鄉黨而祀禱久矣

國朝大元德侔天地象明日月申飭政化律嚴祀事鄉耆等
念彼勑建以來廟兒未雄仰瞻良可嘆也詢謀僉同推舉里
人劉君仲文人聞雙高聲實兼茂以司其事相與尸而祝之
仍付八村為管可以有作方農之隙廓如是營遂鏟崖堙卑
驅石剪棘削污壤堵勑建兩廡驚材垂億鼠技已窮若更歷
繁難奚堪於通敏老成何有功未晝告辭嗣聞堪職者其胡
公委任也若時登庸敢不祗服訓命鳩眾殫力捐財恢復宏
規開拓遺址補苴罅漏枝梧邪傾以門以墉燥濕有庇晨夕

董視不日功成棟宇檟楹塗丹朱牖截然一新林木陰森聖
泉湧滴群峯帀秀接遠澗之清流瀉松岫之積翠信一方壯
觀之地僉謀倂功諸公獻議自以為王德及後世無可稽之
言請刊石名之有百世之利享百世之報不然余則過矣一
日袖卷來謂余曰欲託書為記義固不可辭畧撫其實以聞
弗能具載其管內英髦姓字皆列碑陰故書以告曰揚王德
兮振四方銘豐碑兮照萬古

皆大元大德元年歲次丁酉仲秋上旬 日管錄胡嵩
等立石

進義校尉平陽路武鄉縣達魯花赤兼管本縣諸軍奧魯
兼勸農事藥火難

本縣典史樊宝

司吏閻恩 王賢 翟珪 韓思賢

古韓張玟同弟張琇刊

按碑題王汝楫撰會仙觀道士史道遵篆額武鄉縣志會
仙觀在縣東監漳村碑末列武鄉縣達魯花赤藥火難典
史樊寶皆可補今志職官之闕

聶珪碑

碑高七尺八寸三分廣四尺二寸五分四
十一行行七十五字正書今在平定州

大元故平定等州大總帥聶公神道碑銘 并序

嘉議大夫翰林學士知 制誥同修國史李治撰

前集賢殿口通議大夫劉子書并篆額

龍集辛亥之冬平定等州大總帥聶公北觀

口庭越明年春三月乃膺

□□無何以勤瘁被疾是月廿有三日薨于和林□之寓居
享年五十有六秋七月既望將葬于平定萬吉鄉之嘉水原
其夫人王氏率諸孤持幕客□□各所作行述以來告曰自
公之為□州□□闕百死心力殫盡迄茲廿餘年僅若小□
而簡書筐篋曾不遑終食之安

大明東井方忻城□以觀太平而天不憖遺遽捐館于外□
□也□□□□□神道之碑猶未樹立竊懼歲月滋久聲
實俱泯大爽傷于厥心吾□□公周旋既有年矣公之志子
之志也□□不子乎祝尚誰為祝治退惟鄙陋雖不足與□
不朽感念疇昔之好其奚辭謹案聶氏世為太原壽陽人有
名曰知微舉進士不中試充誥院令史者公之王父也有男
子三曰燾□熙熙蚤□□善□產鄉里稱其仁燾□書筭典

司本縣酒稅務平生多陰德□有男子七曰琬琳瑜珂□福
哥□平瑜官至招撫使琦今為縣丞燕有男子二曰璋珪璋
字廷臣讀書緝文嘗售藝有司得□解以軍力終於晉州招
撫司副都統珪字廷玉即公也典司□□安王氏生公公生
不半朞而孤□成童繼失所□□能卓□□□從兄璋問學
天資開敏夙擅月□之譽□庚辛巳間邊圉始耳攝太原府
事趙公德裕寄理榆次之利和砦一見公器異之遂辟為委
差官公為規畫軍實□充歲壬午 天兵南牧所在瓦解利
和竟不守公知天意有歸亦率眾附俄隸河東大帥完顏
公未幾授招撫副□□同都元帥王璋招捕平定等州諸砦
柵三數年中莫不弭耳聽約束迨丙戌春璋□公□為兵馬
都元帥□璋□□副焉□素□很軒□自恣公每痛貶其所

為貴積不平潛結恒山武公仙夜□□叛丁亥春正月元日
遣杜□王善等戕公其徒德公遇已厚不忍□□其體緣弓
弦縊□昇置子城西北隅□夜仙使人斷取公首而公之帳
下督王常□聚武贊等視公可救緩其□而活之公跳奔太
原夏五月太原繼陷公挺身免已而畫策檄本路諸帥復克
太原不踰月再會□□攻平定取之時城府雖稍安輯而威
孟皐遼南北數百里例負固為恒山按守都行省桓察□里
根合□两千戶討仙多公謀勇委以前茅公徑覲仙於石人
砦而別遣兵四□□陽團□民□□等既歸□義而敵帥
宋佺要瑾□一時來降秋十月石人既破仙率左右竄仙臺
砦仙□□州□□要害處也又圍之十月乃潰生□五千
其居山東者悉縱令□□西之民留之但合家□九月都

行省考功第賞陞公平定阜晉威孟遼儀等處總□都元帥
守令以下聽公選注□□任能各得理所故政□而民愛之
兵勁而敵畏之都行省嘉其□越戊子春正月□以金虎符
印章□□之二月敵所署威州倅斬不□□芝治□□古成
擁眾據□□□□甚公以兵攻□□二日而破不藉禽□
□逃去夏四月又攻石龕州□生者張仲降已而燾泉若□
貴亦以□降九月聖□□州其□□弓天才降歲己丑兵修
若郭彬部男女二子餘來歸□□□州無守備我□□□於
是箕陽以東□□□籠岡山等諸壘□動其首□□□廣率
眾峽嶠是歲冬兵攻井陘□石砦其摠領□聚相繼欵附歲
庚寅北山鳴主趙德□屢入寇公躬□據言□□無所□□
常恃清風團圍之險請公不足慮以眾來□戰于張家河德

崩摧生縛□□□□□彼□急□□氣吾公□我□
 威名舊矣余為公机上肉復□□道然我自曩以勇聞公誠
 我□會當□□□報公□□□□□一切德所為因□窮
 搜入平山境至羅家砦而招撫張山降至保安砦而總領趙
 降□後德亦竟蹈□□以戰死辛卯春二月□州內趙
 家砦張福程□榆次山牛木英砦經略□□□□□□
 積招撫郭山樞竭招撫王澤亦以次降壬辰春恒山公雖
 陽翟之□封而其黨□據阜遼公出奇計□□散之
 癸巳春再擊新砦潰遠□大駭□河北南路曰□北路□
 西路□□□總帥金符鎮二面至是悉投戈來降甲午夏
 恒山驍帥家□寇□□公馳追之義已去公歸次□□獲義
 碑□□寶□山公遣其總領劉常義等□之且□以方略令

誘執□黨盡得其□之所由公復率銳卒直搗其□□義已
鼠竄焚義之母李及其息阿驢併□□以歸□□狼狽北還
□崦谷□門二砦□□平芝阜落公詢知其謀移□之路□
□掎角之砦尋披□仙□遞其安撫王嚴□招撫史雄康義
等俱降歲乙未東山羅喉來輯□拒□受命公談□□攻破
□□□□健□傳堅者數輩常合晉趙諸軍環攻之不能下
□公威略咸啓顙厥□願□使令由□□□壽陽東□井陘
遼儀以北仇由以南了無風塵之警矣時 朝廷以城□為
官長無所統一□□之制度公改拜平芝阜邢晉等處長官
公天資仁愛雖宿怨義嫌人所不能容者曲為調護反若報
德初王者□以□公故□見殺避□不敢□公召來深拊□
之曰大口各非其□□事何□忍况爾等不肯殊死我是固

惠我者可今而為怨家□□相委毋□卒信□之家帥義累
危害公及子母就執□□給養者餘一□既知義□□平山
乃擇其左右之循理者□予之人以為難能當新砦之再破
也所俘男女為□無□□千大帥習力吉思欲盡阮之□□
以為不可開闔至十數知其言終不售行次民安乃私散其
眾□□□迸既而習力吉思亦以眾星散不復可追遂歸王
寅春有劇賊李□□者聚徒鈔劫僭□□府□倚公□討
既成□□□人人□當斬臨刑公意其閒多脅從者贖捐金
□贖之□□□公曰□子為賊地邪將坐□□□公曰果□
無一人以冤死吾□□□猶□□□□馬頸擬刃者□餘□
□戮渠魁而已公之救人濟物以身任□害□□□不復顧
□□□若□者蓋不可以勝數其莅官嚴而不近於察其從

事寬而不涉於苟於其緩急重輕悉有條理次第□□□
使民務本又時其或配麻課布以□並□分養雞豚以資厨
傳歲遇乾溢射□四望雨暘各以時應乙未夏秋之□飛□
彌漫數千里而境內不知有羽□其接人以□賓客□門輒
□形於色待之□旬累月惟謹一日無□□為不樂家盛畜
法書名畫務極精□新□於几席間物位置□有繩尺以是
時人子之□整齊之目居無事恒□禁方合良劑期以□人
□□不爾則□為□□以自怡悅□嘗詩寄湛□□書君□
欽挹甚還以□酬□並有文章太守□語又嘗有□松亭二
絕句極為人所傳誦夫人王氏拈而順婉而肅稱為公之配
焉男三人大本承襲平定等州軍民長官改拜奉議大夫南
□□□□管府事大□汾州長官大授樂安縣巡檢餘□

女二人長適太原鄭轉運之子守讓次適太原與魯萬戶閻
鎮之子居安餘幼夫出奇計以伐姦謀流惠政以息民肩布
大信以結人心諒皆可傳者也惜乎□之所□期□□所
以目□者□□□一方不及於天下□□□□有所傳而
其所未究者猶可恨也然而有民有杜功名暴□德風澤雨
扇潤千里在大丈夫之志抑亦足矣是可以銘否□□拜首
而為之銘曰

智□微仁博施孚盈于死不□惟公躬稟(清)□□安□□
(方)黃草昧始河披攘洪流北□□揚古石□晉□□□□
□羅百咎盜□□囊橐內公是時身枝撐万死地幸一生
公為誰活窮□殫者□□□□春□□□誰使□□□
□

皇御極公朝□□夫風雨衝眠食愆續一屬□□□□
□□□□方令人□□何銜功足載嘉水廩□公宮
碑新耀無窮告邦人敬栢松

大德二年歲次戊戌夏六月□□日

宣授將仕郎潭州等路□□人□同提舉次男□器立石
核碑題嘉議大夫翰林學士知制誥同修國史李治撰前
集賢殿閣通議大夫劉閣書并篆額元史治傳字仁卿號

敬齋真定樂城人登金進士第調高陵簿未上辟知鈞州
事歲壬辰城潰治北渡流落忻崞間世祖潛邸聞其賢召
之至元二年再以學士召就職朞月復以老病辭去卒於
家所著有敬齋文集四十卷傳言流落忻崞碑又言感念
疇昔之好以治在崞忻嘗與聶公周旋故云碑題學士與

傳合碑言辛亥

憲宗元年

平定州總帥聶公北觀明年春三月

二十三日薨於和林校元自憲宗以前皆都和林見元史

平定州志聶珪

字廷器

少孤從兄璋學初授招撫司副使同

都元帥王璋招撫平定等州諸寨璋死代爲元帥璋弟貴副之貴素驕恣珪稍加檢制貴不平潛結恆山武仙以叛密遣力士刺珪賴衛士救免奔太原都行省桓察遣感里根合討武仙以珪爲前驅襲破仙於石人砦進攻克之以功授平定等州總管都元帥守令以下聽其銓注任賢使能各盡其長行省嘉其績予以金虎符珪性寬厚雖仇怨亦容之家居喜賓客耽吟詠多購古今書畫與元遺山李敬齋王青峰友善卒贈西陽郡公子大本有學行平江路治中孫輝官至陝西行省參知政事致仕通志金石記元

名臣事略徐世隆四賢堂記初聶侯珪帥平定聞敬齋李
公之名而賢之延至郡舍會遺山元公還太原過之爲數
日留因追憶閑閑文獻二老作詩云百年喬木鬱蒼蒼
舊風流趙與楊爲向榆關使君道郡中合有二賢堂聶侯
起謝曰此珪志也方經始而聶侯卒按敬齋卽李治此珪
與李治爲友之證碑云按聶氏世爲太原壽陽人有舉進
士充誥院令史者公之王父有三子曰肅曰熙闕肅有子
二曰璋曰珪璋終晉州招撫司副都統珪字廷玉卽公辛
巳間邊圉始闕攝太原府趙公德裕寄理榆次之利和砦
辟爲委差官壬午天兵南牧所在瓦解利和竟不守率眾
闕附俄隸河東大帥完顏公授招撫副闕同都元帥王璋
招撫平定州諸砦柵以下多有闕文卽州志璋死代爲元

帥事碑又云潛結恆山武公仙丁亥春正月元日遣王善等戍公其徒德公遇己厚不忍

闕

緣弓弦縊昇置於子城

西北隅夜仙使人斷取公首而公之帳下督王常

闕

視公

可救緩而活之跳奔大原按碑言聶公被縊事較州志爲詳按王利用周千戶碑丁亥春正月恆山武仙圍忻州蓋王貴以平定附仙故兵得至忻可與碑相參證碑又言夏五月太原繼陷公挺身免已而畫策檄本路諸帥復克太原攻平定取之時城府稍安而威孟皋遼南北數百里負固爲恆山按守遺山集樊侯壽豕記往丙戌之春侯從征淮海常山軍取太原及吾州當卽其事

樊侯記言丙戌者指樊侯從征侯卽

元文博羅傳

碑云桓察云云有闕文卽州志都行省桓察

遣惑里根合討武仙事碑云公徑襲仙於石人砦秋十月

石人旣破仙率左右竄仙臺砦平定州志石人寨在皋落村一統志石人寨在樂平縣■七十里周二百步山峻而盤折澗有一石如兩人相負故名按武仙傳自正大五年前史不詳續通鑑金正大四年卽丁亥有史天澤攻武仙高公抱嶺諸砦事蓋仙失石人仙臺而奔高公諸砦失高公諸砦而奔汲縣以史合碑年月證之可知碑述公自戊子至甲午歲有戰伐乙未乃定所言用兵諸事皆可補史闕碑又云朝廷定制度公改拜平定皋邢晉等處長官新砦再破大帥習力吉思欲盡阮之公私散其眾習力吉思亦以眾散不復可追遂歸又贖劇賊李事皆陰德之大者其云壬辰春恆山公雖闕陽翟之闕封金史武仙傳正大八年十一月仙由荊子口會鄧州軍天興元年正月丁酉哈

達布哈敗績於三峰山仙從四十騎走密縣卽其事按諸
碑金末析代以南平定以西皆爲武仙馮陵震蕩之境其
據砦合徒爲金興復者皆受仙之號召史傳零落無由詳
考諸碑所述尚見大概金史云九府財富兵強恆山最勝
者信不虛也甲午乙未蔡州已亡恆山公亦死而故將尚
有據山寨者可謂金之義民然當大軍在前民兵踞險立
砦不惟自保身家兼可杜賊旁竄不爲無功至大事已去
欲恃山寨以成功業徒令生靈塗炭曾無絲毫之益也又
按元丁亥太原之陷見元史攸哈喇巴圖傳原作哈喇巴圖傳戊寅
授金虎符河東北路兵馬都元帥鎮太原丁亥五月姦人
夜獻太原東門於武仙仙引兵入哈喇巴圖歿於陣與碑
言丁亥夏五月太原繼陷合元遺山詩集過皋州寄聶侯

箋注以爲聶珪觀妙齋金石考李治有平定等州大總帥
聶公碑大德二年立按卽此碑又以碑升平定皋晉威孟
等處州都元帥考之元初蓋以平定爲總管府與忻州爲
九原府同金史地理志平定州縣二樂平興定四年正月
升皋州晉州興定四年正月以壽陽西張寨置太原府縣
十一孟興定中升爲州威州下刺史天會七年以井陘縣
置此四州皆近平定故珪得總之九原統代崞堅臺四州
此統皋晉威孟等實皆總管府也又閭鎮見朝元觀碑

靳和碑

碑高六尺廣二尺九寸二十五
行行五十五字正書今在絳州

有元故絳陽軍節度使靳公神道碑銘

翰林學士承

旨資善大夫知

制誥兼修

國

史董文用撰

昭文館大學士中奉大夫掌諸路頭陀教

賜圓通玄

悟大禪師雪菴李溥光書

儒林郎秘書少監楊桓篆額

至元二年歲乙丑八月丙寅絳陽軍節度使靳公卒其次子
嶺北湖南道廉訪簽事用元貞二年十一月命孫德信具行
事來京師口口史文用曰先君勤勞

王室績用備著

非得名筆一言無以詔來世用不孝無狀敢請銘焉文用聞
言之無文行之不遠懼不敢當願嘗與簽事用同寮諗聞家
教之賢曷敢固辭公先太原汾州人裔出西漢汾陽嚴侯族
號威大厥後徙居平陽曲沃地以爵名至今稱靳長官莊雖
譜牒湧漣而金大定間一碣尚存曰奉議大夫蓋五世祖也

曾大父蒙亨大父宗明考祕娶樊氏生公及弟妹各一公諱和字達道資性英邁志度軒豁家多貨樂周人之急捐金指廩無吝色而人樂從之會貞祐擾攘公以子弟從軍策戰功陞用聲譽甚赫越己卯歲公知天意有所屬領義兵三千歸于我太師國王王奇其才略授以征南帥時境內初定人尚驚疑命公留鎮巢穴蟠據如葛□鰲背彈平青龍諸寨時肆剽掠民病之於是選強壯置鄉兵習攻鬪寇至則戰寇退則耕民得脫矢石免流莩無生而有生繫誰之功

上嘉之命知絳陽軍事

錫金符凡可興利除害者盡

力所至到今絳人德之視尹鐸之於晉陽羊枯之於襄陽殆不是過歲辛亥謂二子曰吾備嘗險艱竭力王事餘四十年今天下既定盍乞身以佚養暮得旨俾長子

麟嗣職絳陽用授曲沃尹公閒居十五年終于家之正寢年六十有七葬曲村東古塋元配樊氏幼亡娶鄭氏失於兵亂再娶夫人張氏又李氏氏麟後公卒鄭出也用偕女適楊思孝翼城令次女適蕭範武略將軍沁州尹次女適喬椿征行千戶戰歿守節張出也女適史用禮女適許氏李氏氏出也孫男口麟男國忠先卒女二曾孫九皆用之後抑吾聞之盛德者必有後不特魯之威孫也夫天授公以非常之才而疑非常之變盡忠戮力戡定禍亂活絳陽元元之命為國長城以立

皇元萬世太平之基宜進而退未老而

閑位似未滿其德然食其德之報者獨不在後之人乎余昔治衛及為臺臣於用聯事至元丁丑余居衛用先為汲尹知用理蹟最悉以戶不滿萬之飢民而給初收江左之般運用

能力顧於

朝而民賴以口有

旨開沁通漕用能以舉家入沒為請力爭其不便而事遂以寢既為沁水犯衛諸州其言卒驗為御史為廉訪所至廉直有聲吁即世美之濟可以觀節度公世德之積矧夫旣旣蕃衍又未艾也銘曰

於穆靳公 逢時之艱 天鍾其良 忠貞是安 受

命于 王 以禦暴殘 德行于家 名顯于官 民

保其業 不飢不寒

帝錫寵符 師尚桓桓 是生 御史 戔戔豸冠 有

爵有名 芬馨若蘭 曲沃之鄉 惟口之原 有口其

魏 有石嶢旣 鑲此德音 式垂後昆

大德二年六月日男奉訓大夫解州知州兼平州諸軍奧

魯勸農事用立石

李福成刊

按碑題翰林學士承旨資善大夫知制誥兼修國史董文用撰昭文館大學士掌諸路頭旆教賜圓通元悟大禪師雪菴李溥光書儒林郎祕書少監楊桓篆額按至元十七年靳公長子麟己乞段成己製銘文用爲篆額元貞二年文用又應次子嶺北湖南廉訪簽事用請爲撰碑銘以元史文用傳考之至元二十五年拜御史中丞遷翰林學士承旨三十一年成宗卽位上都命文用從行是年詔修先帝實錄升資德大夫知制誥兼修國史大德元年請老歸六月戊申卒碑撰元貞二年題官翰林承旨知制誥云云與史合書史會要釋溥光字元暉號雪菴俗姓李氏大同

人特封昭文館大學士

按宋熙寧以前制昭文大學士賜以加首相元授僧人斯爲濫矣

號元悟大師爲詩冲澹粹美善真行草書尤工大字國朝

禁扁皆其所書

國朝謂元

欽定佩文齋書畫譜引懷麓堂集

趙松雪過酒肆見帘字謂當世書無我逮者而此書乃過

我問知爲雪菴李溥光也因薦之朝今趙城縣元提舉常

君墓碣題禪師溥光書尚不著姓與官此碑則直著姓與

官蓋以見一時恩遇之盛繁峙縣元王氏世德碑題楊桓

篆額以元史桓傳考之至元三十一年拜監察御史成宗

卽位升秘書少監

預修大一統志秩滿歸宛州大德三年以國子司業召未赴卒

與碑題

官合史稱桓尤精篆籀之學著六書統六書源書學正

韻大抵推明許慎之說而意加深皆行于世

書史會要揚桓善大小篆

書著六書統以詔書刻之尚方篇帙浩穰學者莫之能究

然則桓實兼通小學不止

工書也碑云靳公裔出西漢汾陽嚴侯

汾陽侯靳彊見所
史記漢書表

云曾大父蒙亨大父宗明父祕皆與段碑同餘亦多與之

合惟段碑漫漶者今以之互證如段碑公之父上闕祕字

再娶夫人下闕張字均可据補

碑言元配樊氏幼亡娶鄭氏段則止言元配鄭氏

碑云余昔治衛

謂為衛輝路總管

及為臺臣

御史中丞

於用聯事

曲沃志用

拜監察御史以此碑聯事考之則用

余居衛用先為汲尹

為監察亦當在至元二十五年六月

據此所言開沁通

段碑用遷榮河尹

授汲縣尹無年月

據此所言開沁通

碑則尹汲在至元十三年

文用為衛輝前

所言開沁通

漕事詳見董文用傳

傳言至元十四年

詣清漕司言事適

漕者文用曰衛為郡地最下大雨時行沁水輒溢出百十

里間雨更甚水不得達於河即浸淫及衛今又引之使來

豈惟無衛將無大名長蘆矣會朝廷遣使相地形上言衛

州城中浮屠最高者纔與沁水平勢不可開也事遂寢按

沁水最狂猛今設黃沁廳治之不時猶被其

害豈可開以合衛乎漕司之議為不達矣而不及靳用

力爭不便事得此可補史闕元史五行志至元二十年六

月沁河水涌溢壞民田一千六百七十餘頃當卽碑所言
沁水犯衛事碑末題大德二年六月日男解州知州兼本
州諸軍奧魯勸農事用立石則是年用又知解州也又青
龍彈平諸寨見金史瓜爾佳寶倫傳元光元年十月元兵
圍青龍堡詔以寶倫權左都監會上黨公晉陽公往援之
兵次彈平寨東三十里敵兵梗道不得進會青龍堡破召
還可與此碑相參

西禪院產業銘

碑高一尺二寸廣一尺八寸三十三行行二
十五字至二十七字不等正書今在絳州

絳州西禪院用公和尚創置產業銘

兵火隳殘已來師復立如故又將己之衣孟所置到地土付
院門供給口住尤恐年遠至有爭奪深為悞也故立金石為

龜鑑焉今將正平縣吉莊村院子一所計玖畝村北白地一段東西至道南王清北王進四至內計地壹頃六拾畝次北一段東西道南張二北張和計地五十畝村東北地一段東墓西道南王厨老謝北道小范計地九十五畝又地一段東阡西南道北曹家計地九十畝次南一段東阡西道南王進北元家墓計地一頃又王莊曲下水地一段東王師楊三西王師南北渠計地四畝半次西水地一段東至渠南渠西南李三李大西道北王章計地柒畝磨道北水地一段東渠西道南王社長北王章計地四畝三分神後水地一段東河南楊三楊万西楊小一北河計地叁畝半夾道白地東西道南柴二北趙大計地十五畝小道南白地一段東北道西王進南楊信計地九畝又地一段東王社長南北西楊山四畝半

石橋南地一段東河南西柴社口楊二寸北小道計地一畝五分院子一所南至河南小道北至迎神道西至神地東北道東至郝社長楊社長計地九畝又在城水地一段東至渠道東南放法師南廟西法眷寺北胡僧正皇令計二畝五分次東水地一段東普賢院南鍾樓院北李經歷西渠計四分又城北開水地一段東江權州南至牆北渠西張二計一畝二分北門裏水磨一月內二十日城南坊街西地基四間南李四北王大夫西至南禪院蔡村東河北稻地一段東靳元帥西郭明之南席仲寬北靳元帥地三畝又河南稻地一段東渠西天河南小毛大北澤掌寺四畝又地一段東郭二西河南用戒師北河地四畝又城北祖師墓地一段東口西賀家南道北阡計地二十五畝

故立此碑 以為不朽 將此置地功德 上祝

□之聖壽 下保万姓之咸安 能公讚曰

東泉千頃贍金田 古刹重光出此賢 尤恐季深无證

據 故鐫雄碣振西禪

本院前任持沙門謹吉祥 監寺僧敬吉祥 知庫亭吉

祥

維那僧□吉祥直歲僧□吉祥 正安 善琛 正昭

善輝 證聚

昔大德二年十一月一日西禪院換□買水地僧倚吉祥
立石

本院尚座沙門相吉祥書丹

崇教大師講經律論傳戒沙門釋宝用誌□

按碑以用公和尚創置產業而立所言地名以絳州志考之如吉莊在歲豐鄉龍贊里王莊在七坊鄉賢婁里蔡村見水利鼓堆西一渠經蔡村灌三泉地八頃碑有云靳元帥地按通志金石記曲沃有元鎮南大元帥靳和墓碑沃絳連境疑碑所謂靳元帥者卽其人末有能公讀題大德二年十一月一日西禪院僧倚吉祥立石此碑臚列地名畝數無文義可言而所載村莊等名尚足爲考晉故者之助

運城孔子廟記

碑高五尺九寸廣二尺五寸二十行行四十五字正書今在運城

陝西等處都轉運鹽使司新作孔子廟記

集賢學士太中大夫盧摯謨

朝列大夫侍御史石珪書

昭文館大學士榮祿大夫平章軍國事行御史中丞領侍儀司事不忽木篆額

解梁之墟民聚幾二千家鄜衍咀望州而繇曰路村者以饒利自出從陝西都轉運治鄉士民協力漕臣願廟

先聖其地至元壬辰劉公紹慶實揔漕事實始圖作是廟未歲事以受代去今使與屯公茂規而隨之以一衆論用克以大德戊戌之冬落成厥功為禮殿重檐巨楹羣跂絢耀視大邦君之居像

先聖先師十括服章位著如禮宣講堂殿後以居師生開其門櫺崇其垣墉以示揭虔妥靈攸宇中條雷首顧瞻伊迓相其高明殷然為他郡廟學之冠六十子諸大儒之序及館舍

庖廩皆位置之使可曰以就緒其規所以須學校之費者又未已也嗚呼公其勤且德於是鄉厚矣侔來徵記文於摯曰國家尊鄉儒術自京師至凡郡邑莫不廟祀

孔子示為指南斯文本教養而媿俗尚於是焉在夫三代盛時家有塾黨有庠術有序路惟一鄉今有廟學亦尚昭

聖治哉茂謨淺學未有聞廟事告成而獨無補思所以自効無愧於前使於吾同僚惟是恃雅素於公庶得一言刻著廟石不朽以謝不敏摯惟學校尚矣學有祀事由其道固所以報之然使民觀禮識古以節性日邁於善又有在也夫摠漕有職課殿最有法謹正鹽筴課贏常年不使山澤之利有遺所先務也孰有游刃餘地宣

上德意以扶翼斯文為心如公者哉夫古之君子見賢思齊

樂道人之善然則公所求以自効獨非吾黨所以自効者與
大書特書懼吾文之未稱副也是歲十二月廿有六日記

大德三年四月廿七日立石

承事郎陝西等處都轉運鹽使司副使吳恕

奉議大夫同知陝西等處都轉運鹽使司事太昔不花

中順大夫陝西等處都轉運鹽使耶律世樞

中議大夫陝西等處都轉運鹽使馬合麻沙

校今安邑運城志學宮在運司治東南大德三年運使奧

屯茂建碑言至元壬辰劉公紹慶總漕事圖作是廟未藏

事今使奧屯公茂以大德戊戌之冬落成厥功與今志合

又今運司治爲路村亦見是碑宋制轉運使司稱漕司都

轉運稱總漕碑所稱沿宋舊名也

今運城志元時姚行簡建議修池掌權始立司

於路村延祐間更名聖惠鎮元史食貨志世祖中統二年初立陝西轉

運司仍置解鹽司於路村至元二十三年改立陝西都轉

運司兼辦鹽酒醋作等課與碑言路村陝西都轉運司治者合食貨志大

德六年改陝西運司為河東解鹽都轉運鹽使司直隸中書省碑題集賢學士盧摯撰侍

御史石珪書昭文館大學士不忽木篆額不忽木元史有

傳今欽定本作博果木原注原作一名時用字用臣受

學於國子祭酒許衡日記數千言由利用少監歷官參議

中書省事至元二十三年改工部尚書九月遷刑部二十

七年拜翰林學士承旨二十八年拜平章政事本紀三元

貞二年春拜昭文館大學士平章軍國事本紀三大德二

年行中丞代崔三年兼領侍儀司事百官志侍儀司與碑

所列官合傳又言博果密至元年上書請宏闡大都國學

極推崇聖教

不忽木高車人

是亦元初色目人知尊儒者故碑以

得其篆額爲榮元史本紀大德二年正月己酉以集賢盧

摯耆德舊臣清貧守職特賜鈔亦與碑所列摯官合書史

會要盧摯字處道涿郡人元初稱能詩者以摯爲首官翰林

學士有疏齋集已佚元文類有其文元史石天麟傳子

珪累官治書侍御史遷樞密副使爲侍御史與碑題官合

又見元史成宗紀碑文內總漕劉公紹慶及碑末有副使

吳恕同知太昔不花陝西都轉運鹽使耶律世樞馬合麻

沙均可補今志乘之闕

在大德六年前故稱陝西運司

荀息廟碑

碑連額高四尺二寸廣一尺九寸四分二十四行行三十

九字額題晉荀大夫廟碑六字均正書今在鄉甯縣柏山

重修晉荀大夫廟碑銘

井序

前順德路儒學學正牛師顏撰

里人進仕費瑤書丹

三務相副官董謙題額

鄉（寧）縣地名鄂川春秋時晉鄂侯食菜之邑屈產之境也縣東半舍地有栢山廟其山無雜木惟以栢故名廟者晉大夫荀叔之祠也其（明）壠在焉邦人思大夫捨生不忘君之恩臨難不失臣之節祠而祀之積有年矣初獻公之用大夫之計聽大夫之言不為之不明也及其甘驪姬之言嬖二五之偶不能防微杜漸養成禍胎以致世子罹殃諸子被害文惠放逐幾乎覆宗昏惑不悟前日之明則掃地矣其將終也尚以驪姬故屬奚齊于大夫大夫竭股肱之力盡忠貞之心不二君言事雖無益競没于難可哀也夫噫獻公中人也猶不知

悔况末流者哉果獻公能悔過自新召文公歸國使大夫佐之肯輔文公行於五霸之間乎必以二帝之道為經三王之業為緯俾文武之美不墜周召之化復興文公勲業其可量哉驪姬奚齊卓子亦不至於殺身矣嗚呼為人臣為人子者可不慎與故孔子曰臨大節而不可奪者大夫有焉以此論之宜常為神食民之祭今之居是邦者莫不致礼于廟下家君從仕宰是邑時常欲易其圯楹腐瓦奈以事防不果大德二年秋本縣達魯花赤脫脫赤保義思其廟之將摧恐墜祀事惻然而懼謀於附祠六館舍之眾曰苟大夫忠貞之神也我輩坐視其廟摧毀事不媿乎僉曰此段奇事非我保義莫克成就願我保義董治其事我輩助之於義甚當保義樂然而盡力焉於是起曝厦以障風雨設神厨以饗犧牲眾工齊

事百役一心壞者復完故者復新未及小至工役訖功明年
春風雨順序二麥有秋故尹之孫維那張旅洎術士韓卓与
土人薛進袁顯劉義蘭興宋榮張清輩議勒諸石命予銘之
辭曰

鄂川洋洋兮豈叔之意栢山蒼蒼兮通叔之志殺身以成仁
兮執一不二宜常為神兮民敢廢其祀事身雖云亡兮名實
不墜万古流芳兮非忠貞之奚致

大元大德三年歲在己亥五月辛巳朔十五日乙未

司吏張昱 尚思敬 郭從善 張子謙

三務副使相里思恭

鄉寧縣典史郭文煥

鄉寧縣主簿兼尉兼管本縣諸軍奧魯周君佐

從仕郎鄉_寧縣尹兼管本縣諸軍與魯兼勸農事胡元貞
保義校尉鄉_寧縣達魯花赤兼管本縣諸軍與魯兼勸農
事脫赤立石

估匠趙恩 石工王順楊美刊

校碑題前順德路儒學學正牛師顏撰進士費瑤書丹三
務相副官董謙題額師顏据碑有家君從仕宰是邑時語
當爲元貞中縣尹牛天麟之子從仕其階縣志天麟元貞
年任重建文廟作新學校合碑文常欲易其圯楹腐瓦證
之與重建文廟相類故知爲天麟費瑤縣志元進士厯官
至郎中以儒雅見稱董謙縣志亦云進士碑云鄉甯縣地
名鄂川春秋鄂侯食采之邑屈產之境史記晉世家唐在
河汾之東百里故曰唐叔虞集解世本曰居鄂宋忠曰鄂

地今在大夏正義括地志云故鄂地在慈州昌甯縣東二

里

昌甯後唐改鄉甯

又晉世家晉人復立孝侯子郟爲君是爲鄂

侯碑所云鄂侯也唐書地理志隰州有屈產府太平寰宇

記隰州石樓縣有屈產泉不云在鄉甯第今吉州爲晉北

屈地鄉甯其鄰壤碑云屈產或本於此孤文單證存之可

耳碑記以大德二年秋達魯花赤脫赤重修而作有故尹

之孫維那張旅云云末所題官有三務副使相里思恭鄉

甯縣典史郭文煥主簿兼尉周君佐從仕郎縣尹胡元貞

保義校尉達魯花赤脫赤皆可爲考晉故者之助宋建隆

三年有碑述建祠之由可與此碑相參證碑見通志金石

記

封永澤王敕

碑高五尺二寸廣二尺八行
行二十五字正書今在運城

上天眷命

皇帝聖旨上善若水能潤下以作鹹至誠感神宜錄德而定
位載申褒美洞貫幽冥解州鹽池資寶王富埒東溟惠周西
土弗假牢盆之費坐收畦戶之功暢六氣以無窮冠五行而
為最七廟享時供之品四民獲日用之資驚紙十行龍光萬
世均輸便利聿聞課局之多增沃灌豐饒默祐源泉之不舍
宣昭朕意用荅神休可加號永澤資寶王主者施行

大德三寶年八月 日

按元史成宗紀大德三年二月壬申加解州鹽池神惠庸
王曰廣濟資寶王曰永澤此加封永澤之制文又見王緯
池神廟碑其云富埒東溟者謂海鹽云坐收畦戶之功者

校解鹽池有畦見唐文粹梁肅鹽池記曰修畦綺分以如織崔澤真應靈慶池神廟記曰町畦不沒崔敖河東鹽池神祠頌曰梟之爲畦宋史食貨志崇甯三年解州鹽池開二千四百餘畦按業畦者爲畦戶故碑云未題大德三年八月日與廣濟碑立時同王緯碑云是年七月封與本紀異

封廣濟王敕

碑高五尺廣二尺一寸一分八行行二十五字正書今在運城

上天眷命

皇帝聖旨朕惟我國家統御以來無德不報自天地化育以往靡神不宗矧爾解州鹽池惠康王肘腋閼河衽席秦雍冠洪範五行之首浸璇璣巨蟹之區味永作鹹不讓汪洋之雲

海光凝上善若儲突兀之雪山煎熬既省於民勞烹飪悉資
於日用惠康之實廣濟無窮列爵雖崇念錫封之已舊榮名
增媿宜褒命之惟新可加號廣濟惠康王主者施行

大德三年八月 日

按元李庭解鹽司新修鹽池神廟碑宋元符元年霖潦彌
日壞官亭鹽室不可勝計崇甯四年春遣羅州觀察使王
仲千即宋史食貨志發丁夫回山谷之汎濫完堤坊之圯

闕是歲鹽竇初成凡境內祠廟皆賜之封號兩池之神東

曰資竇公西曰惠康公

按此為兩池別封之始唐大曆十
二年賜祠曰資應靈慶封曰靈慶

公者系專祀池
神未分東西

大觀二年加以王爵又翰林直學士王緯

池神廟碑大德三年七月加池神封運城志元大德三年

加神號為廣濟為永澤即此碑加號廣濟事碑見寰宇訪

碑錄

山右石刻叢編卷二十八

山右石刻叢編卷二十八